

蕭碧堂集

瀟碧堂集卷之十一

石公袁宏道中郎撰

麻城李長庚西鄉閱

叙

序呂氏家繩集

蘇子瞻酷嗜陶令詩貴其淡而適也凡物釀之
得甘炙之得苦唯淡也不可造不可造是文之
真性靈也濃者不復薄甘者不復辛唯淡也無
不可造無不可造是文之真變態也風值水而

荷生日薄山而嵐出雖有顧吳不能設色也淡
之至也元亮以之東野長江欲以人力取淡刻
露之極遂成寒瘦香山之率也玉局之放也而
一累于理一累于學故皆望岫焉而却其才非
不至也非淡之本色也里昌氏母有文譽而遂
溪公尤多著述前後為令不及數十日輒自罷
去家甚貧出處志節大約似陶令而詩文之淡
亦似之非似陶令也公自似也公之出處超然
母味似公之性公之性真率簡易無復雕飾似

公之文若詩故曰公自似者也今之學陶者率如響搨其勾畫是也而韵致非故不類公以身為陶故信心而言皆東籬也余非謂公之才遂超東野諸人而公實淡之本色故一往所詣古人或有至胥不至余束髮已知嚮慕公近者吳川公梓其家集始獲盡公及高氏三世之藏吳川公者公仲子高才邃學先兄庶子之師也為令以伉直著聲閱數月亦去遵先轍也懷公集三十年出入必俱令春始成帙遂以先大父孝

廉公三詩賦冠首而已所著若干卷綴其後孝
廉公之生甫廿有二歲才思澎湃如川之方至
吳川自出機軸氣雋語快博于取材而藻於屬
辭比之遂溪蓋由淡而造於色態者所謂秋水
芙蓉也昔陶氏五男不好紙筆而遂溪之後雲
蔚霞起豈黃頭歷齒所敢望哉王元禮論家門
集曰史稱安平崔氏及汝南應氏並累葉有文
才所以范蔚宗云崔氏雕龍父子三世然未有
七葉之中人人有集如吾門者也余邑不能文

而恥言文最為惡習獨曷氏能世擅其業噫彼
安知烏衣諸郎為史所豔稱若此也

叙魯太史集

嘗恠退之論文其觀于人也笑之則以為喜譽
之則以為病夫文道之貌也唯恐不式奚取人
之嬉笑呵怒以為快及讀公所著毛穎傳無甚
僻者當時以為譏戲不近人情雖至相習如張
文昌輩猶有遺訾其嘆伏以為絕奇不可及者
獨柳柳州及李肇耳夫人情譽因而惡創其所

習觀曹然好之耳目稍易驚詫頓作安在譽之
不為病也余寸力不逮古人而妄意述作一時
諸君子所膾炙者謬以為非遂欲去同取獨世
爭咲之而退如曾太史獨以為近古過相印許
余與退如非素暱也豈別有氣味耶余之稱與
毀不足道而使退如有譽無鹽之癖世之笑之
當有甚于余者也退如詩清新微婉不以儻傷
其氣不以法撓其寸而余詩多刻露之病其為
文高古秀逸力追作者館閣之體主嚴退如則

為刁斗為樓閣叙記之作主放退如則為江海
為雲烟余文信腕直寄而已以余詩文視退如
百未當一而退如過引若以為同調者此其氣
味必有合也昔人謂茶與墨有三反而德寔同
余與退如所同者真而已其為詩異甘苦其直
寫性情則一其為文異雅朴其不為浮詞濫語
則一此余與退如之氣類也退如善名理一時
同志如雷何思蘇潛夫齒蓋合而水乳契是其
中有真臭味非文字相也雖然此猶龍氏所稱

下士聞而笑者其于文一機軸也昔有禪人為
老衲所姍笑羞澁不能出一語次日請益老衲
曰汝見登場傀儡乎曰見曰汝不及也禪者悚
然問故曰渠愛人笑汝畏人笑耳此語與退之
互相發退如欲見性命於文章乎抑即文章見
性命也俱當於笑中求之

監司周公實政錄序

代

天下之理亂視吏治浮實而已卅之敝也為政
者獵華譽而以城池錢穀為俗吏事嗟夫事誠

俗也盡天下之吏而皆以為俗誰為任事者此
游談也古稱繪事家貌鬼神多工而人物乃拙
何也冥漠者易詭近取者難似也夫高談浮譽
鬼神也無才者之所跼匿也繕修錢穀之事人
物也經世之實畫也晉之君子喜為清談而陶
士行為荊州刺史獨曰老莊浮華不可行至於
私稻官柳木屑竹頭皆親自綜理晉賴以安晉
之南渡不即胡羯者俗吏陶侃力也宋之君子
高談理學而孟璞王少隨軍伍至其帥荊湖首

通三海修十隘作公安南陽兩書院以待襄蜀
士之歸者史稱土木之工百七十萬而民不知
役宋之恥所以雪而夷虜不即鳴鞭者俗吏孟
珙力也使一廿之吏而皆俗若此俗亦何惡噫
此荆楚故事也今天下承平改修職舉縉紳先
生裒衣博帶足以坐鎮而浮譽漸張綜覈少裒
筦庫糠粃之說亦時有之監司周公來蒞荆土
獨去一切華飾修行實政其大者如繕城浚隍
興學積貯清屯恤郵量淤湖去浮糧等類皆王

改首事興除具備公通籍三十五年一操不易
大都恂悞無華不求人知故公以是見挫然亦
以是見伸公之學如良金在冶久而彌精又如
深山松栢飽歷風霜愈見遒古蓋公之才識卓
而又閱歷世態久甘苦辛酸備嘗之矣此自古
國家大事所以常倚辦老成人也今公以外臺
僉晉卿秩此實異典昔丙吉謂魏相曰朝廷已
知弱翁治行方且大用今公知矣措此實改于
天下猶反掌也某等下吏日奉公教條從事淑

公最親而不能挽公之去遂以公所行實以一編次付之剞劂冀以自程復用垂示將來公行矣異日荆人將尸公與陶孟而三之

陶孝若枕中藝引

夫迫而呼者不擇聲非不擇也鬱與口相觸卒然而聲有加於擇者也古之為風者多出於勞人思婦夫非勞人思婦為藻于學士大夫鬱不至而文勝焉故吐之者不誠聽之者不躍也余同門友陶孝若工為詩病中信口腕率成律度

夫鬱莫甚於病者其忽然而鳴如瓶中之焦聲
水與火暴相激也忽而展轉詰曲如灌木之縈
風悲來吟往不知其所受也要以情真而語直
故勞人思婦有時愈于學士大夫而呻吟之所
得徃徃快於平時夫非病之能為文而病之情
足以文亦非病之情皆文而病之文不假飾也
是故通人貴之

謝于楚歷山草引

古云詩能窮人又云詩非能窮窮者而後工也

夫使窮而後王曹氏父子當為傖夫而謝客無
芙蓉之什昭明兄弟要以純綺終也唯云詩能
窮人大似有之管城親而牙籌疎一不合也氣
高語率令人自遠二不合也富者惡其厲繇仇
之若敵貴者忌其厲官避之若祟三不合也有
一於此皆足以窮而况併之故云一日執管三
朝廢饗妻子之所羞而宗黨之所怒也是物者
何益人秋毫事而余輩酷嗜之余與于楚交有
年初于歙再于白下于廣陵于燕市每見必以

不可詰而智者了之唯是一法初祖曰心如牆
壁可以入道大鑒曰本來無物何用掃除是即
祖師門下金剛圈棘栗蓬之前塵也一切五位
三句玄要料揀總不離是夫扁筴閉鑰以防盜
也而盜之竊筴也唯恐鑰之不堅我以干櫓禦
而彼即竊吾干櫓以來故曰為之符璽以防之
彼併吾符璽竊之或銅或竹或龜或魚或科斗
或帛爪以示不可測而偽滋甚然終不得廢符
唯智者善通其變以救一時之詐而所謂符乃

益多後來者見方圓之各異黑白之各不相入
以爲古法廢盡而不知本一符也其用在可爲
信不在符之同異也孔子曰殷因於夏損益可
知今之讀尊宿語錄及提唱綱宗者以爲古人
如是平常後人如是奇特疑謗取捨囂然百出
而不知世道之機實使之然祖師無是也且世
道何過法立而敝生敝更而法移法與敝自相
乘除要之世道亦無是也世不信不得已而有
符道不信不得已而有法法豈有實哉壇經符

之始也中頗有贗者夫披沙而見金不若純金之愈故畧刪其贗與其俚而複者要以天下有道守在四夷雖符亦無所用之矣

賞心集引

雨中坐艸堂閱明教所裒賞心集用心良苦如好方人處處覓方或敝簡冊或田翁野嫗或叅訪道侶所有單方異藥盡入手籍凡天下秘密之證與不可救療之疾指掌無復遺恨而一遇常病寒熱相反陰陽少乖厯試諸方無一驗者

其人乃大惱曰我方非不奇而世人之病自不與方值諸人以不善病病吾方非吾方咎也必欲取天下秘密之病以驗方而所謂秘密者又百出於此其人煩懣不知所出請問醫王醫王笑曰諺不云乎學方三年無病可醫學醫三年無方可學子但能察脉識源方在汝心不須覓也其人媿服明教徧歷方數儲藥如丘余適有覺病乞一海上異方未知可否有則願為檢出不然是吾不善病適不與方遇也江西有葛道

人者客予里善談陰陽生剋每一病出則云東垣若何丹溪若何素問內經又若何病者聽之以為盧扁復出而及其取效反不得與余村鄔州頭陳打卦等此非不遇病之過泥於治之過也明教好方人也余則談陰陽生剋之葛先生而已因書卷首以俟公異日一笑

郝公琰詩叙

郝公琰訪余柳浪以詩為質且以舉子業求政余告之曰夫詩與舉子業異調同機者也唐以

詩試士如樵李不言行不由徑等篇束於對偶
使事如今程墨然而集中所傳多其行卷贈送
之什即今之窓課也今代為詩者類出於制舉
之餘不則其寸之不逮逃於詩以自文其陋者
故其詩多不工而時文乃童而習之萃天下之
精神注之一眇故文之變態常百倍於詩迨於
今雕刻穿鑿已如才江錦瑟諸公中唐體格一
變而晚矣夫王瞿者時執之沈宋也至太倉而
盛鄧馮則王岑也變而為家太史是為錢劉之

初至金陵而人巧始極遂有晚音晚而文之態
不可勝窮矣公琰為詩為舉子業取之初以逸
其氣取之盛以老其格取之中以暢其情取之
晚以刺其思富有而新之無不合也公琰年少
而才新年少故非出於制舉之餘才新故非逸
於詩以自文其陋者今所著詠懷詩具在清新
雅逸絕無贅語浮詞極他日才情之所合嘉州
長江可漸至也一舉子業又何足以難公琰哉

張茂才時執小引

僧冷雲過柳浪出茂寸張君時執若干求評余
笑曰少而習之今忘去久矣余每見坊間時刻
輒昏昏然如醒者之在枕也聞兒輩讀如聞三
韓語了不辨夫唯余衰朽不入時乃不知彼之
佳若使余以為佳則彼亦故機老錦非復入樣
花纈也余友潘去華為塲屋老手往年官壘卿
弟小修以文求質去華閉目搖手曰時過矣恐
悞君君以今日之袁生質余而余以舊日之潘
生正君君所尚者成周之文而余所守者結繩

輒以穿輸公帑不以時鐺索之聲琅琅道塗持
籌者盈縮其額餌其半公家之籍不如令甲令
往往注下考每歲終課堤役里閭騷動滑民黥
吏倚為谿壑而堤頽削如故諸青衿睨其旁持
短長高步濶袖令煦煦然如慈媪之于驕隣故
邑數十年無善治邑父老為余言前時有楊侯
稱能吏以高第遷余時童無所知識自總角後
所見邑令長若干人久者四三年近者數月一
歲輒毀傷失名落落以去即邑中士民亦謂茲

邑果足以厲令雖宓子賤西門豹復生無可復
措手也錢侯來甫閱歲數仞之官巋然官寺區
署敞者更蠹者飾江上為層堤縱橫之縱者以
捍橫者以衛邑人士鄉土之心始定市肆漸豐
樂入廛之氓以歲月至民供輸無追逮者耻不
先比閭功曹書文字而已鈴下備傳呼無他指
使誕辭者匿而去訟寔常虛日高春則已放衙
諸縫掖以文事至揖而坐白摘字商移甲乙不
厭以公事至假以溫顏或過激則平氣以諭以

不直被摘至示之三尺已心懾則以情寬譬之
其人乍慄乍溫士無不戴且伏郵驛之客所至
如舍供具侈饒吹騶卒皆奉成命無敢譁者直
指使庶得其實以治行最聞于朝會漕使者亦
上侯治狀夫今之黃童白頭猶昔氓也高冠長
裾猶昔士也陽侯之波非偶恬而窮奇之腹非
有厭也羈鞅絡繹不減於前錢穀簿書不縮於
後昔也廢今也舉昔也囂今也熙昔為瘠數今
為腴鄉影表離神不捷於此由此觀之令待地

耶抑地待令耶侯為人豐頤廓額精神舉體操
潔而度充機活而才捷史稱劉道民目覽詞訟
手答箋書耳行聽受口並酬應不相叅涉皆悉
贍舉邑侯有焉夫皎皎者近刻而優優者近庸
倜儻者自用而博取者人用之侯以寬行其清
故無苛清以虛用其裁故無逸照霜雪以礪之
春陽以膏之龍泉之鋒而以試毛何有此叢爾
也異日者行之天下書之史冊當與京兆益州
並傳高第云乎哉

囂然集堦墀公目而指之曰其宜散宜飲宜某
法餌畧無倦容迨至期年而城圯之圯者無不
飭道路之凸凹者無不平有識者或謂余是藻
心也而吏幹若是龔黃所未有也余曰是固於
文一機軸也公之文嚴於法而沉於氣往往詘
常調而自伸其才故變幻詰曲無不極情之所
至今公之果於裁者文之法也寬以調文之氣
也使民若士之喧然者百至而有應文之詘常
調而自伸其才者也故曰文章與吏事一道也

今之握鉛槧者其初檢括陳言而一旦為吏遂欲舍所學而聽於胥故經術與政事二少時習誦詰耳壯而成名迫於應酬之不得不然間一習為篇章與有韻之文而復不暇故時執與古文詞貳貳之則交病漸靡寔然公秀發之才出之有本故卒然而藻之為文飾之為吏繩尺之為舉子業其機圓故其道可一貫非獨問學功邃抑天之所畀卓也余於此道貳之者也今公杜轅而子大夫以文見役是使拙工運斤於班

僂之室也然余於公若有宿契而公亦若謬嗜
余者故不敢以拙陋辭日者公馳一函見示云
入秋不病病而漸以癰賴兩耳架格進賢余躍
起曰太守癰矣而百姓肥夫豈獨一郡國哉異
日肥天下抑亦是政也是文也

送劉學博序

天下所以治平者獨賴是二三青衿耳而其治
鑄之功首寄之郡若邑之為博士者博士任重
而權輕所教之人皆天子異日所與共治天下

者彛倫之堂與先司寇師比屋南向左詩書而
右禮樂其赦行則天下泰赦不行則天下塞非
區區刑名錢穀關係一郡邑者而其官乃至不
得與長吏肩無論直指校文二千石諸大吏降
而有司皆得治其臧否杜面而奔走之如其屬
兢兢然伺其口齒奉行惟謹而所為弟子負者
又多高心濶步方領大帶仰目而視如所不屑
其賢者可以理論而其不若者不可以刑督其
難視馴百姓倍蓰夫以極重之任挾不威之權

而御不可刑督之驕子弟是猶縣九鼎以一毛
而帥諸嬰以扛也劉君必登者南昌人以訓遷
吾邑諭邑諸生畏而愛之朔望課其卷繩以程
朱之脉無不肅者暇則進之道先賢故實君饒
吏才當事者委署委堤皆有能聲語具別碑中
先師殿圯君毅然捐月俸議加脩構直指而下
賓之何論長吏其重固然所謂輕與難盖未有
余甚異之今君又自吾邑授撫州矣屢遷而得
儒秩饗者以為冷且儉而君甚喜以為但自去

其輕與難吾之任固有重於他吏者也蓋余嘗授京兆未幾而教國子又未幾而授儀曹三遷皆領諸生同志嘲余有青衿緣他日或為校文但不知措大運何日脫耳今余亦以此嘲君他日其為六館乎兆三之矣然則君與余皆有青衿緣者但知其重不知其輕且難也

送潛江潘明府伯和入計序

尚璽卿潘去華忘齒交余兄弟深相知每與余析易義余輒倒而余間出一難去華未嘗不心

醉也去華善人倫嘗云敝邑兩佳士其一為姪
伯和其一余持國也持國為余同門友故雅相
得而獨以不識伯和為恨既官吳閭小修弟來
自去華所津津談伯和器識歲戊戌伯和第春
官謂是定交且近京師拘酬答例司閹者與主
人意不屬一再刺門止未幾伯和令潛江潛故
荆巖邑今雖豐沛屬則猶唇齒也山居以來守
龐公禁不敢以一字通顯者故雖素所傾渴如
伯和亦竟絕書郵然余友蘇潛夫一歲三四過

余柳浪談今時循吏輒首伯和所謂催璫折筵
冰其身而利其穎者出其緒餘已自卓絕一時
要以潘氏家學窺天人之微茫入性命之奧域
是未足以盡伯和也今征車且戒路矣闔郡邑
之人交口而頌令尹無亦惟是尹之緒餘而余
所傾重顧不在此外第陝亢之公秋闈首拔士
也率諸同門友乞一言贈師行余不敢以誦令
尹者誦辟之古鐘鼎貴色者色貴形者形貴款
識者款識夫時流標目則亦士林之款識也余

雅重之故特述以為獻

送葉使君還朝序

余山居以來荆之為關尹者若而人而獨與今
葉公敬君善敬君喜談學津津經術或者謂公
大儒將遺略細務而君綜理周悉如櫛之于髮
甫下車即除一切厲取一錢必籍掌故商民戴
之若慈父母或者虞其報滿將不中格且有罰
而君若不聞者已而商爭趨竟無負額余聞之
嘆曰葉使君心密而機靜經世才也夫聖人之

撻天下即撻其心者也故忠信聖學也泉府通
焉後之君子輕試其才于錐刀緼籌之間故其
術止于桑弘羊劉晏而其究竟為士林之不屑
宋之安石慨然以學自命其始亦侈言理財也
而其心近踈氣近躁故道失而財隨之非理天
下難所以理心者難也余觀敬君公事之暇輒
進諸生商略性命無一語不入解間托為舉子
業以暢舊旨無一語不中聖賢竅奧以至六書
四韻皆辨析毫髮雖紛龐叢雜之中而幽閒自

得手不遺編是其心未嘗以靜躁二是真學術也
也榛天下之密樞也今天下之利孔百耗于唐宋
而其規利之法百苛於間架手實使君此行試以
密心籌所以復天子及司國是者昔者畢仲游奏
記司馬以為人主行新法者事也而欲興作患不
足者情也苟未能杜其情而徒欲禁其事向來用
事者必榛不足之情言不足之事以動上意雖致
石人而聽之猶將動也為今之策當大舉天下之
計明出入之數使天子曉

然知天下之餘于財則不足之論不得陳于前
矣先得書聳然夫神宗大有為之資也以為必
如是而後可以富中國故王呂之說行誠若卑
仲游之言其心不攻自破矣惜溫公之未盡用
也今上英特之姿恥不為堯舜區區嗜好之
篤當必有萬不可解者舉世無能喻其然豈誠
不喻抑心未密耳行矣使君天下事煩君者不
少唯真學術可以應之幸勿謂關事卑且暫釋
負也

壽洪太母七十序

乙巳秋九月廿六日孝廉弟宗中母洪太夫人
七袞族少長咸集以次進觴最後及小子宏族
先生命曰子禮官也詞命子所顯蓋為一言以
觴宏再拜謝不敏乃曰凡木之婆然者必也其
根之堅實者也是故百圍之幹至於干雲薄霧
而其榮瘁消長唯根為是托故根者母道也今
孝廉弟翁然就榮如花果之方蓂榘楠杞梓之
用將在異日請以是觴族先生曰是佳喻也然

天下之為薦紳母者皆可以若言誦宏曰余家高祖而下世不乏賢而昌其年者多在母氏屈指王父行為兄若弟者凡十有幾問其人慶曆相禪之初僅有存而王母在堂上者至今猶可數也屈指大人行為兄若弟者凡四十有幾問其人至今三之一存而諸為母氏者若干人也故述袁氏者張母德為請以是觴族先生曰小子善述他日載譜牒為賢媛盛事可也雖然是門佳話也為袁氏母者皆可以誦宏曰余家

族屬分三大支而長最繁凡三傳而子若孫幾
三千餘指長居十之七八今伯母之膝下跪而
稱觴者子十有一人孫三十有許人鸞停鵲峙
瓊芬蕙列又長支中最繁盛者華封人之所稱
母蓋具有之請以是觴族先生曰盛哉抑報緣
也母之所以令不與若更言之宏曰母內以脩
飭相夫子以道往時宗人推伯為長一切國課
戶訟受成議于伯所母傾筐倒橐咄咄治辦宗
人以是益親聯絡支屬如臂指之相使是母之

功在祖宗者也。伯既卽世，家日益落，母改苦茹酸和丸課子，賢書既登，馴取上第。撫異母子，如已出，皆有成立，是母之功在孫子者也。家雖酷貧，好施不厭一粒一縑，與諸啼號者共。是母之功在鄉邑者也。三者家牒所譽也。國史所收也。請以是觴族先生，啟齒曰：小子之言善而有徵，斯實錄也。夫閨房之耀，非文不傳。小子識之以俟異日編彤管者。於是太母色喜，命諸孫子給賓從，飲飲極謹，酒行無筭而退。

壽李母曹太夫人八十序

凡物所托者堅則其發必巨而用必遠是故金
玉銅鐵之資于世也而其胞為石蓋必有冲厚
鎮奠之質而後能孕天下之材以為世用菌之
生也以朝夕萍之生也以日月生非不暢也所
托者脆也百圍之木必于崇岡五年而一輪十
年而一節而後棟宇椽題之用施于朝廷而被
于天下故凡物之為遠施洪受者必其母之歷
大春秋者也余友李獻夫母曹夫人年八袞精

神炯炯如壯年獻夫高才早有文譽而其登賢
書也乃在強仕之後蓋余嘗閱薦紳先生起家
遲晚壽考通顯常十之八而年少青紫至于黃
耆者或不得四五余因是而知天地之乘除造
物變合遲速之理也獻夫妙年已稱場屋老手
托于堅而窘于萌是故不屢經節候則宣暢不
盡然一宣暢而其望干霄非一兩一膏之滋息
所能校榮潤而程功力者也余以母之貞恒驗
獻夫之遲故知獻夫之用大又以獻夫之數遲

而用大驗所托之非常故知母之為高陵喬嶽也獻夫為人開爽敏捷果于任而敢于言胸中有蓄吐之唯恐不盡而其文有奇氣沛然若瀑之注峽蘇子曰士以氣為主獻夫之用廿余以氣決之非臆斷也蓋天下唯至翁生至張山以翁為體而天喬以蓄為用故唯母之凝結乃獻夫之所以發舒也母女于曹而失怙最早言笑不出于閨以女則泚相夫子以事翁若姑母貧而聚順以媛則賢課其子有成立為母顯儒以

母則式母盖有仁者相也孔子曰仁者樂山又
曰仁者壽世不信壽之必仁仁之必有後也蓋
于山之翦然鬱然者觀之

徐景鳳元輝叅訂

門人袁鼎度無涯初校

吳士冠相如手書

瀟碧堂集卷之十二

瀟碧堂集卷之十三

石公表宏道中郎撰

麻城李長庚西卿閱

記

入東林寺記

江州半日程抵東林石路縈折然猶未當山足
遠公與而菴之宗雷陶謝疊足而崖竇之雖微
佳山水固已心折殿前藕池耘為稻畦數年前
忽秀白蓮一枝妄意六時堂中人當有來者此

一時也茶竟聽泉石上遇其泓則漱嶼則坐不覺至西林時微雨山色為雲所扃稍露半髻獨下雉諸巒晴霞如彩光射澄湖冶波鱗鱗西望良久乃去

雲峰寺至天池寺記

雲峰寺而上道愈巖青崖邃谷匝疊而行絮而粘屨者曰雲幽咽而風絃者曰澗獨石而梁一絲百尺下臨千仞者曰錦澗橋纈紅縈碧蜿蜒而導者曰九疊屏

一名九旗峰

怒而兀忽如悍夫之

介而相怖者曰鐵船峰數里一息焚崖而亭之
者五路歟削杖而躋遇泉則卷葉以酌過試心
石望竹林寺後戶泉韻木響皆若梵唄乃拜亭
盡梵剎出上霄諸峰障而立猶在天半佛廬甚
華整覆以鐵一溪漲綠冷然堦下稍定乃上文
殊臺俯盤鷹見背千頃一杯少烏雲縷縷出右
下繚松而過若茶烟之在枝已乃為人物鳥獸
狀忽然匝地大地皆澎湃撫松坐石上碧落而
下白雲是亦幽奇變幻之極也走告山僧僧曰

此恒也無足道

佛手岩至竹林寺記

越石阜度顛僊碑亭東下為佛手巖石叅差而出如凍雲之覆其溜為泉折而行壁愈峭洗苔觀竹林寺額扣石長嘯妄意其中有長眉顰膚其人者聞余嘯而出庶幾遇之攬其袂而去不可得既而笑曰羅漢可遇劉蒼鷹家狗乃齧其血何必竹林寺前也余夢中屢感異景嘗夢至一山純玉峰稜稜如珂雪聖僧導余入小脩從

山壁直度不鏤亦不礙壁盡石匝空而城廣博
嚴整遍鏤調御菩薩像忽空中呼曰善才至貌
可二十許又呼曰二童子至嬰然兩孺也又嘗
夢過村居三官塚者數峰歷歷如以翡翠堆疊
成樹皆滑碧無葉瑩若青珊瑚趨而近見洞峯
稍稍沒余驚怪忽見一黃羅幕發之諸峰見一
僧手梵夾坐謂余曰此清涼近境也盍偕往余
踴躍馳呼二脩俱道旁立長耳踣之駛將至洞
聖僧坐飛見出大如鶴鶴指余所踣者曰是亦

能翔言既肉翅張忽數鳳盤旋從洞口出光彩
樂地若有侯者二脩至逡巡歆上而雷聲發於
簷遂驚起噫余安知茲遊之不為夢也併記之

由捨身岩至文殊獅子巖記

野性癖石每登山則首問巉巖幾處骨幾倍膚
色何狀行莊途數十步則倦而休遇嶮嶮轉快
至遇懸石飛壁下蹙無地毛髮皆躍或至刺膚
躓足而神愈王觀者以為與性命衡殊無謂而
余頽樂之退而追惟萬仞一髮之危輒酸骨至

昨指以為戒而當局復跳梁不可制宿天池之
再晨觀捨身巖巖舌偃而出孤拳絕壑一旦遂
冠諸巖而山中一少年僧稍解意云其下有兩
巖石更適旁僧過之曰徑迂且仄不受履余大
笑趣之行從舊道折而下得支筴剪蘿躍澗中
石捫絕壁更上下得文殊巖一壁皆怒石砰躍
空出坐候泉熟試厓茶良久俯危磴更數盤得
獅子巖石骨拗折頽放已出互相壓而少遜避
者遂為菴址鐵船峰當其面紫鰐凌厲兀然如

悍士之相撲而見其骨及闔因力敵不相下則
皆危身却立摩牙裂髻而望大約三巖皆以純
骨及面峰峭削勝而獅子巖最下下不極則石
之怒不盡鐵船之高不能凌捨身巖而上而獅
子仰視其顛巖與奇適相值谿澗近則鳴悲激
而石始活獅子巖皆據其勝是為天池之絕景
君子之至於斯也或未之見也然路實不甚巖
遊者既不索而山僧畏冠蓋唯恐去之不速是
以不顯余何幸得之高僧徧融嘗菴獅子下三

年正其入悟之始每橫一棒坐巖口行脚來則
棒出之竟無酬其機者融公去石落址遂塞巖
之左存小室梯而度然荒寂甚僧亦無復居者
矣

由天池踰舍嶓嶺至三峽澗記

當余初趨江州時謫仙之飛瀑小蘇之三峽澗
已奔注吾胸如與澗友期將至測焉眄綦履之
聲喜其近而翻虞其滯方過琵琶亭問輿人三
峽澗何在皆曰不聞山極于天池而已至東林

則問東林僧僧曰聞之然在星郡問其道不知也忽天池書記僧來迎首舉以問僧曰有路而削從舍嶠嶺達問其程曰可四十里問嘗至否曰聞老僧言其略實未至也余笑曰爾導我遊壯山盡當挾爾去凡七日而窮其勝遊竟挾容行歷層巒面壁而上數息登舍嶠之巔長江泛漱濁波一綫嶠湖清徹如片照細見帆影湖中諸巒或如蝕翠或如砂斑之凸起圓峯所覆目與之際綠焚黍積尺吳寸楚少焉霧作長風捲

湖而來心怖乃下石削而無級勢若走坂不能
自止山程三十里不當一長亭地山趾平乃輿
數步一疊錯行阡陌間頃之至棲賢廢址山中
人指綠疇而坦者曰故殿基石澗汨汨流從徑
左折得玉淵潭澗水奔流而下展轉與大石觸
方怒忽得平石雷瀉數十丈底規而末垂水得
盡洩其屢張屢折之氣遂悍然不顧厲聲疾趨
而石斗疊忽落為潭水勢不得貼石則架空懸
注斜飛十丈餘而後墜虹奔電落響震山谷間

潭面皆膩石稍縱足則溜其極無底觀者皆目
眩毛豎不敢久立沿澗而疊數折得三峽橋橋
堅緻雄麗其下清崖可席相與酌泉而坐稍定
沿溪行巨石巍恠或眠或立湍水撼之一澗皆
咆號砰激嶮毛沚艸咸有怒態當其橫觸洶湧
雖小奚亦瞋目佇視如與之聞忽焉石遜消然
黛碧觀者亦舒舒與與不知其氣之平也余私
以語客歷試之良然乃大笑五老峰壓疊而下
嶽如與澗爭道一日之中耳窮于鳴泉目眩於

幽碧舌燥於叫愕踵蹇於企曳是亦天下之至
觀也偕遊者倦甚枕流水卧而暮色欲來以水
濺之亦不赴山僧設茗供一杯乃行

開先寺至黃巖寺觀瀑記

廬山之面在南康數十里皆壁水從壁罅出萬
仞直落勢不得不森墮躍舞故飛瀑多而開先
為絕勝登望瀑樓見飛瀑之半不甚暢沿崖而
折得青玉峽峽蒼碧立匯為潭巨石當其下橫
偃側布瀑水掠潭行與石遇齧而闔不勝久乃

歛狂斜趨侵其趾而去遊人坐石上潭色浸膚
撲面皆冷翠良久月上枕澗聲而卧一客以文
相質余曰試扣諸泉又問余曰試扣諸澗客以
為戲余告之曰夫文以蓄入以氣出者也今夫
泉淵然黛泓然靜者其蓄也及其觸石而行則
虹飛龍矯曳而為練漚而為輪絡而為紳激而
為霆故夫水之變至於幻恠翕忽無所不有者
氣為之也今吾與子厯含嶠涉三峽濯澗聽泉
得其浩瀚古雅者則為六經鬱激曼衍者則騷

賦幽奇恠偉變幻詰曲者則為子史百家凡水
之一貌一情吾直以文遇之故悲笑歌鳴卒然
與水俱發而不能自止客起而謝次日晨起復
至峽觀香爐紫烟心動僧曰至黃巖之文殊塔
瀑勢乃極杖而往磴狹且多折世州割人面少
進石愈蠟白日蒸厓如行熱冶中微聞諸客皆
有嗟嘆聲既至半力皆憊遊者昏昏愁墮一客
眩思返余曰戀軀惜命何用遊山且而與其死
於床第孰若死於一片冷石也客大笑勇百倍

頃之躋其巔入黃巖寺少定析而至前嶺席文殊塔觀瀑瀑注青壁下雷奔海立孤寒萬仞峽風逆之簾捲而上忽焉橫曳東披西帶諸客請貌其似或曰此鯨人輸綃圖也余曰得其色然死水也客曰青蓮詩比蘓公白水佛跡孰勝余曰太白得其勢其貌膚子瞻得其怒其貌骨然皆未及其趣也今與客從開先來歌削十餘里上鑠下蒸病勢已作一旦見瀑形開神徹目增而明天增而朗濁慮之縱橫凡吾與子數年陶

汰而不肖淨者一旦皆逃匿去是豈文字所得
詮也山僧曰崖徑多斥宜早發乃下夜宿歸宗
寺次日過白鹿洞觀五老峰踰吳障山而返

識廬山記後

發廬山之日曰康子六月朔窮覽十日足不停
屨奇奧畧見記中遊而未入記者曰大林寺萬
杉寺金竹坪黃龍潭赤腳塔火場慈雲嶺三塔
菴水口菴衆僧塔講經臺烏龍潭獅子林青林
且天靜室淨業堂白雲林擲筆嶺遊而未果者

曰康王谷三疊泉偕遊者曰漢陽王章甫僧寶
方明空程生地主為德化令楊君楚人甚賢尾
而至不及上山遇于潯陽舟中者曰僧無念其
以使事竣舟行偕諸公遊且叙其事者曰石公
表字也

遊德山記

甲辰夏月余與衲子寒灰冷雲雪照及居士張
明教小僧習之弟小修習靜荷葉山中約以秋
涼入德山至八月初旬暑氣微减小修入黃山

余適有便舟遂偕諸衲行十四日發舟孟溪十
五夕看月馬湖湖與洞連接水光千里生平看
月此為雄快十七日晨抵德山潭下江上望山
如卷石微見菁林已薄岸行得委巷崖綠翳目
有丘焉如覆鑑榭蔽之根猗猗若瘦臂擎石而
上兩巒之凹為澗前則茉莉夫人鬼宮道也塔
院踞澗後負高峰而面層壁葱菁多古樹院內
外皆田兩巒相讓而却初讓為澗再為院為田
最後讓益甚地益坦兩山之勢益張遂為佛廬

入門多古杉栢殿堂高廣像設亦奇大辟如阿
房舊址見者知其非漢以後帝王居也從殿脅
而右多美箭幽崖相蔽折而上即峰頂頂有善
卷壇崖桂盛開芳香襲一山數敞宇架其上敗
人意幾欲下而瞰壇上光景意勃勃從烈日下
望望復避避復往山翠水光匝而繪之使有佳
士撤其冗室間為亭榭軒楯固德山一絕景也
然山中勝處山僧多不到到亦不解余與諸衲
徧覓諸奇如三桂林之幽敞可室青蓮舍左崖

可亭法堂西之小靜室多方竹處可榭可閣無
論幽邃靜勝其間百圍之樟尺圍之篁亦非他
處所有也山後面陽山有地空濶河流漲其前
直見雉堞田廬烟嵐疊波而出茸而廬之可置
叢林使德山法道再興當不能舍此為僧郵也
入德山二日登覽略盡兩龍君載酒來飲極歡
盡三日夜乃罷別後暑氣大作遂坐山中與諸
衲極談慶快無量至九月六日始入城詣兩龍
君蓋此山乃鑑大師舊戰場風柯水音爭為敷

演瞻其遺像不覺鋒穎之穎利也兩龍君者長
君超孝廉次君御民部與余兄弟有宿好奇士
也

由河湫山至樅源縣記

余既謝兩龍君將解維而君超忽來盛稱花源
一帶之勝余曰此名蹟不必佳山水固佳也遂
命舟逆而上君超從陸是夕會于河湫山次日
重九登高茲山之顛溪邊兩霞石映綠潭甚麗
下而席之迫午乃行夜泊樅源縣山光散目溪

水激魚梁甚怒起步學宮前石砌百尺平滑如
水月光照之光景清澈樓閣闌闌吞烟吐霧是
亦山縣之絕勝也夜中與諸衲閒譚余生長水
鄉百里無片石見似丘者而喜矣是邑何緣偏
占丘壑豈山水報緣亦有定業邪諸衲不對乃
就枕

由淶羅山至梔源縣記

江上望淶羅山如削成顏嵐峭綠疑將疊焉從
此一帶山皆飛舞生動映江而出水縹綠見底

至白馬江山益夾水益東雲奔石怒一江皆飛
沫是為浪光之天山南即避秦處上桃花溪百
步從間道出後嶺玄武宮其巔宮甚敞道士迂
於門指數與僻處曰某丹臺某滄鼎池余愛戀
山色苦不欲記之有碑焉苔蘚剥落不可讀道
士閉目莊誦如快小兒課魯論不覺失笑趨而
出見道旁古松偃蹇有異態為之却行又數折
得桃花觀從左腋道入竹路幽絕一黃冠簪筍
皮白鬚照兩顴如紅霞疑其異人余肅冠裾將

揖之未數步騶而前余笑益不止偕遊者以余
為暴得佳山水會心深也觀周遭皆層峰淡冶
入繪觀前為馳道車塵馬足畧無歇時截馳道
而南入桃花洞無所有唯石磴百級蒼寒高古
若有人焉而不可即余讀瞿童記有云偶造佳
地見雲氣艸木屋宇飲食使人澹然忘情不樂
故處此與竹林方廣何異蘇子瞻泥於殺雞一
語遂以為青城菊水之類至韓退之洪景廬益
不足道矣甚矣夫拘儒之陋也出洞已昏黑是

夜遂宿水溪去洞二里許

由水溪至水心崖記

曉起揭蓬窓山翠撲人面不可忍遽起船行踰水溪十餘里至沙蘿村四面峯巒如花藥纖苞濃朶橫見側出二十里內秀蔭閣眉殆不可狀夫山遠而緩則乏神逼而削則乏態余始望不及此遂使官奴息轡於山陰夢得悼言于九子也又十餘里至倒水巖巖削立數十仞正側面皆霞壁有竇八九下臨絕壑一竇懸若黃腸者

五見極了了問山中人云有好事者乘漲倚艦
令健夫引絙而上至則見有遺蛻沉香為棺其
言不可盡據然石無寸膚雖猿猴不能攀不知
當時何從置此又半里至漁僊寺寺有伏波避
暑石室是征壺頭時所鑿餘竇厯厯如僚幕寺
幽絕左一小峰拔地起若盆石尖秀可玩江光
岫色透露窓扉間一老僧方牧豕見客不肅問
幾何衆曰卑丁無徒侶相與咨嗟而去又數里
至穿石石三面臨江鋒稜怒立突出諸峰上根

銳而却末垂水如照影又若壯士之將沙石腹
南北穿如天闕門高廣略倍山水如在鏡面繚
青縈白千里一規真花源中一尤物也一客忽
歎有若甕鳴余因命童子度吳曲客曰止止否
則裂石頃之果有若沙礫墮者乃就舡又十餘
里至新湘溪衆山束水如不欲去山容殊閒雅
無刺露態水至此亦歛怒波澄黛蓄遞相親媚
似與遊人娛大約山勢回合類新安江而淡冶
相得略如西子湖如是十餘里山色稍穉水亦

漸洶湧為仙掌崖又數里山舒而畦見水落而灘見為仙人溪既迫夜舟人畏灘聲不敢行遂泊于灘之渴石上灘皆石底平滑如一方雪因命小童烹茶石上次早舟發見水心崖如在舡頭相距纔里許榜人踴躍頃刻泊崖丁崖南逼江岸漁網溪橫齧其趾遂得躍波而出兩峰骨立無寸膚生動如欲去或銳如規或方如削或欹側如墜雲或為芙蓉冠或如兩道士偶語意態橫出其方者獨當溪流之與適古之極對面

諸小峰亦有佳色為之佐妍四市皆龍湫深綠
畏人崖頂有小道房路甚仄行者股慄數息乃
得上既登舟不忍別乃遠崖三匝而去石公曰
遊仙源者當以淥蘿為門戶以花源為軒庭以
穿石為堂與以沙蘿及新湘諸山水為亭榭而
水心崖乃其後戶云大抵諸山之秀雅非穿石
水心之奇峭亦無以發其麗如文中之有波瀾
詩中之有警策也君超又為余言靈巖及諸山
之幽奇甚多要余再來余唯唯他日買山當以

此中為第一義也

徐景鳳元輝參訂
門人袁升度無涯初校
吳士冠相如手書

瀟碧堂集

八

瀟碧堂集卷之十三